

ta in eas coniecta, ut mali, antennæ, plutei, latera earum denique signorum modo sagittis constipatis fixa essent: complures hostium biremes & triremes deprefferunt, ut reliquæ magno accepto detrimento eas reliquerint. Galli post hæc cum sibi nulla in re defuisse viderentur, cognoscerentque fortunam omnibus nostrorum conatibus adversari, Antonio relicto abierunt. Hostium classis Naupactum se contulit: eodemque antea rex cum magno exercitu erat profectus. Is cum oppidum terra marique uno tempore cinxisset, nullo a nostris auxilio allato, oppidani coacti deditiorem faciunt.

1499

*Naupactum
a Turcis oc-
cupatur.*

Hæc ad urbem allata, civium animos, qui longe alium rerum exitum expectabant, magno dolore affecerunt: cumque vulgo legati, reliquique qui separatim aut navibus onerariis imperaverant, aut longis præfuerant, hominum sermonibus carperentur, Antonius ante alios, totius populi, quemadmodum imperatoribus qui res minus feliciter tentaverint, plerunque solet accidere, maledictis lacerabatur, quod is tantam, tamque speratam atque a diis immortalibus oblatam ac plane traditam augendi imperii facultatem suis e manibus dimisisse videretur: si eam hostium classem Antonius iusto prælio superavisset, prout eum facere potuisse existimabant, omnem Peloponnesum Græciæque oram Eubœamque insulam sub reipublicæ imperium redigere illum nullo negotio potuisse: nunc cum omnia secus, quam speraverant, evenisse intellexerent, ac Lauredani & Armerii interitus memoriæ hæreret infixus, omnes magno odio in eum ferebantur, acerbiusque accusabant. His atque talibus causis Patres moti, legem in Decemvirum collegio tulerunt, ut Antonio præfectus classis sublegeretur, qui statim conscenderet: ipsi imperium abrogaretur. Et quoniam Thomas Zenus, qui magni animi, magnæque virtutis esse vir ab omni plane civitate existimabatur, fisco pecuniam debebat; fisci autem debitoribus antiqua lege magistratus mandari nullus poterat: uti Thomæ Zeno ea lex fraudi ne esset, quo minus ei navium præfectura quælibet attribui per Senatum

*Antonio
Grimano
classis im-
perium ab-
rogatur.*

pos-